

1671

15.<sup>e</sup> Jan 1712.

## HISTOIRE

## IOVRNALIERE

DE CE QVI S'EST PASSE'  
dans le Montferrat pour la protection  
de Monsieur le Duc de Mantouë, de-  
puis que le Roy en donna la garde à  
Monsieur de Toyras, iusques à la paix  
generalle, & leuement du second siege  
de Cazal.



A PARIS;

Chez IEAN DE LA TOVRETTE en  
l'Isle du Palais.

M. DC. XXXI.

*Avec Permission.*

HISTORICAL


Case F

39

326

1631 hi

THE NEWBERRY  
LIBRARY



# HISTOIRE IOVRNALIERE

*de ce qui s'est passé dans le Mont-  
ferrat pour la protection de Mon-  
sieur le Duc de Mantouë, depuis que  
le Roy en donna la garde à Mon-  
sieur de Toyras, iusques à la paix ge-  
neralle & leuement du second siege  
de CaZal.*



L faut auoïer que parmy les Mo-  
narques & Souuerains, les aïnez  
ont tousiours de grandes prerogati-  
ues, & des auantages par dessus les  
puïnez qui ne viennent pas des hommes. C'est  
pourquoy il ne se faut pas estōner si nostre Roy  
tres-Chrestien, estant comme il est, sans dispu-  
te, le fils aîné de la saincte Eglise, & par ainsi le  
premier de tous les Roys de la terre, est en la  
protection particuliere & perpetuelle du bon  
Dieu, contre tous les ennemis, tant dedans que  
dehors son Royaume.

Ses armes sont par tout, & en tout temps vi-  
ctorieuses & glorieuses, parce qu'il craint & ay-  
me Dieu de tout son cœur. & que sa plus haute

gloire est de le seruir avec toute humilité sans aucune sorte de feintise, & Dieu benit si visiblement ses actions, que toutes ses entreprises reüssissent au veu & au sceu de tout le monde, tant elles sont iustes, equitables, & dignes d'un tres-grand Roy.

Les Anglois donc vaincus & chassez, la Rochelle prise, & les Rebelles du Poictou & de la Xainctonge soubmis aux iustes loix de son Empire; Le loing & la protection des Princes ses alliez luy fut en si chere recommandation, qu'au lieu de faire suiure ses triomphes d'un doux repos deub à ses peines, & acquis par ses victoires, sçachant que les Espagnols tenoient la ville de Casal assiegee sous leur General D<sup>o</sup> Gonçales de Cordoia, & qu'on dénioit à Monsieur le Duc de Mantouie la tres-iuste inuestiture qu'il demandoit à l'Empereur de ses Estats. Sa Majesté partit de la ville de Paris au plus fort de l'huyet, & foulant aux pieds, non les neiges, mais les monts, & les obstacles de toute la Sauoye, ayant surmonté toutes sortes de ruses & fuites, se rendit si hautement victorieux dans Suze, ville du Piedmont, que sans passer plus auant, les Espagnols craignant la fureur de ses tres-iustes armes, leuerent le siege de Casal, & laisserent le Montferrat en pleine liberté au commencement de l'annee 1629.

Et d'autant que les Rebelles du Languedoc luy donnoient des nouueaux subjects de gloire, S. M. se resolut de les aller rengier à leur deuoir, & de les chastier en tres-bon pere. Mais auant



que partir de Suze en attendât qu'on effectuaſt enuers M. le Duc de Mantoüe, tout ce qu'on luy promettoit de la part des Roys & Princes du contraire party, ſa Maieſté de ſon mouuement, & par ſes conſeils infaillibles & touſiours ſalutaires de ce grand Cardinal de Richelieu, general generaliffime de toutes ſes armées, & le premier & plus haut Miniſtre de tous ſes Eſtats, ayant deuant les yeux la valeur & fidelité de Monsieur de Toyras, ſeruiteur inſeparable de tous les intereſts du Roy ſon maiſtre, memoratif des glorieuſes actions qu'il venoit de faire contre les Anglois & Rebelles en la deſſenſe de l'Iſle de Ré, le choiſirent pour luy confier les armes de ſa Maieſté dans le pays de Montferrat, ſous l'autorité de ſon Alteſſe de Mantoüe, & cela fait, ſa Maieſté laiſſant M. le Mareſchal de Crequi dans Suze, & ſon Lieutenant general delà les monts partit avec Monſeigneur le Cardinal pour le Languedoc.

Ainſi le 4. Avril de l'année 1629. M. de Toyras partit de Suze pour ſe rendre dans le Montferrat, avec les Regiments des ſieurs de Riberac, Villeroy, la Grange, & Montcha, qui deuoient faire quelque quatre mil hommes, & les compagnies de Cheuaux legers des ſieurs de Canillac, Boiſſac, Maugiron, Couruon, Minieu, & de mondit ſieur de Toyras, qui faiſoient quelques trois cens cheuaux, lesquelles troupes eſtât arriuees dans le Montferrat, furent miſes en garniſon tant deçà que delà la riuere appellee Tanager.

Au Plan que nous auons donné ces iours  
 passez au public du Siege de Cazal, nous y auõs  
 amplement desduit les causes & les motifs de  
 tout ce que Monsieur de Toyras fit de plus re-  
 marquable dans le Montferrat depuis qu'il y  
 fut arriué, & que le Marquis de Spinola, le plus  
 grand Capitaine des Espagnols, fut enuoyé à la  
 place de Dom Gonçales, pour le mettre en teste  
 à M. de Toyras, lequel nonobstant sa venue ne  
 laissa pas de ranger le Marquis de Grano à son  
 deuoir, qui s'estoit rebellé contre M. de Man-  
 toüe son Souuerain, & de prendre à main armee  
 deux de ses places, l'une appelée l'Altare, l'autre  
 Roque-Vignano, & le tout à la veuë quasi  
 du Marquis de Spinola, auquel temps le Regi-  
 ment du sieur de Pompadour luy fut enuoyé  
 pour grossir ses trouppes.

En fin le 8. iour d'Octobre de ladite annee  
 1629. le Marquis de Spinola ayant acheué de  
 faire tous ses preparatifs enuoya son armee dãs  
 le Montferrat, trois mille hommes Napoli-  
 tains, Tarantins, & Espagnols, avec cinq cens  
 cheuaux commandez par Dom Fernand de  
 Gueuaro, comme aussi trois mille Allemans, &  
 & le reste de la Canalerie sous le Duc de No-  
 chera leur general, faisant en tout quelques six  
 mille hommes & trois mille cheuaux, qu'il fit  
 mettre tant deçà que delà le Taner, pour se saisir  
 de tout le Montferrat.

Mais ce ne fut pas pour y dormir à leur aise:  
 car M. de Toyras ne cessoit tous les iours de les  
 visiter assez rudement, & de telle façon, que

7

tant qu'ils furent logez prez de Cazal, il ne cessa de leur enlever plusieurs quartiers, & de faire incessamment des prisonniers, ce qui obligea & contraignit les ennemis de se loger le plus loing qu'ils peurent de la portee de ses courtes.

Se voyant ainsi les coudees franches, & sçachant que les Milanois & Espagnols faisoient la plus grande partie de l'armee des ennemis, bien que la guerre se fit sous le nom de l'Empereur, & que le Roy d'Espagne n'y fut que comme auxiliaire, M. de Toyras part de nuict de Cazal avec quelque quinze cens hommes de pied; & sa caualerie, & passant la riuere de Sexia partie avec petits batteaux, partie en croupe de ses Caualliers, entra cinq ou six mille dans le Milanois iusques à Langouste & portes de Brema, où il y auoit vne garnisō Espagnolle, laquelle fut forcee, la plus part des Officiers menez prisonniers à Cazal, & les lieux de Lengouste & autres, donnez en proye à nos Soldats, qui en rapporterent beaucoup de butin, viures, bleds, & bestiaux.

Le 8. Auiil 1630. M. de Toyras n'ayant autre chose en l'esprit que de mettre des viures dans Cazal, fit vne sortie vers Liurme, distante de Cazal de 16. mille, en intention de rendre tous les lieux contribuables pour auoir du bled: mais les pluyes durant cinq iours furent tellement excessiues, & les aduis que M. du Maine & M. de la Grange luy donnerent, de ce que l'ennemy paroissoit, rendirent ce dessein inutile, estant contraint de retourner dans la ville.



Le 16. dudit mois M. de Toyras fit vne autre sortie avec toute la Caualerie & vne compagnie de mousquetaires vers Ciua y à 15. ou 20. mille de Cazal, où on trouua les ennemis en estat de se deffendre, & les nostres obligez de forcer leurs barricades, où le Combat fut grand, & plusieurs tuez de part & d'autre, M. de Toyras eut vn cheual tué sous luy, M. de Barada apres plusieurs beaux effects de son courage, fut blessé d'vne mousquetade à la jambe, M. le Baron de Pluiers y fut aussi tué, & vn des gardes de M. le Cardinal, qui luy 2. auoit esté enuoyé à M. de Toyras pour luy donner quelque aduis, son compaignon plus heureux que luy s'est trouué à toutes les occasions du siege, & en est reuenu.

Ce mesme iour Gabien & Ville-De-Aris, furent prins par l'ordre de M. de Toyras par deux Capitaines du Montferrat, d'où ils furent apres chassés par les Espagnols, & en ce temps les nouuelles vindrent à Cazal des progres que Monseigneur le Cardinal faisoit en Piedmont sur les ennemis, & comme l'armee du Roy auoit pris Pignerol & Briqueras.

Le 20. dudit mois l'armee de l'ennemy parut delà le Po, conduite par Dom Philippe de Spinola, composee de 12. mille hommes de pied, de quinze cens cheuaux & de douze pieces de canon, & s'acheminant à Pontsture pour l'assieger, vne partie de ses troupes, print en passant dans vn iour & demy vne petite place appelée Bolzola, gardee par le sieur du Tranchard Capitaine



plaine du Regiment de M. de Riberac.

Pontsture fut en suite inuesty & assiegé environ le 24. dudit mois d'Auril, gardee par le Regiment de Villeroy, & 4. compagnies du Regiment de Montcha, munie de 1100. sacs de bled, & de munitions de guerre autant qu'il en falloit, & en estat de tenir prez de 2. mois, mais on la rendit à l'ennemy en 5. iours au grand deshonneur de toute la France, & desplaisir extreme de M. de Toyras.

Tandis que les ennemis tenoient Pontsture assiegé, M. de Toyras ayant sçeu qu'il y auoit dans Moran, lieu deçà le Po, à deux milles de Cazal deux compagnies de caualerie des sieurs Comtes de Sefanne, & de      part de nuict de Cazal, passe le Po, & va charger ces deux compagnies, lesquelles furent tailles en pieces, puis se retira, laquelle hardiesse estonna grandement les ennemis. On ne perdit en ceste course qu'un Cavalier volontaire, qu'un de nostres tua d'un coup de pistolet, prenant son escadron pour une des troupes de l'ennemy.

Sainct George petit lieu, dans lequel nous n'auions que dix hommes sous un Corporal, arresta l'ennemy deux iours & demy, mais le Corporal y ayant esté tué, apres auoir vaillamment combatu, le lieu se rendit.

Le 2. May suiuant Dom Philippes de Spinola fit assieger Rufignan, & en y allant M. de Toyras fit attaquer par toute sa Caualerie & la compagnie des mousquetaires son armee, comme elle passoit le long de la coline proche

de Cazal, & ceste attaque dura trois ou quatre heures. Le Cheualier de Maugirō, & Capestran son Cornette, y firent merueille de combattre.

Le 8. dudit mois de May, Rufignan estant assiegé, les ennemis se saisirent d'un autre petit lieu appellé Auximian, & ainsi fermerent tout à fait les passages des viures, & depuis ce temps-là Cazal n'a peu receuoir aucun rafraischissement.

Monsieur de Toyras en tres-preuoyant & grand Capitaine, faisoit garder toutes ces petites places à deux fins; la principale pour receuoir viures tous les iours, comme il faisoit, encores que l'armee ennemie eust esté dans le Montferrat dès le mois d'Octobre de l'annee passée. Et apres pour amuser d'autant plus l'armee de Dom Philippes, & ainsi donner plus de temps au secours que le Roy leur preparoit.

Enfin Rufignan fut contraint de se rendre par deffaut de viures, apres auoir esté vaillamment deffendu par M. le Marquis de Montauzier avec son Regiment, composé de trois à quatre cens hommes, apres vn siege de 14. iours, sortant le 16. de May avec vne composition honorable, & pour luy tres-glorieuse: car il luy fut permis, avec vne trantaine de ses amis, & des plus braues, non de se retirer en France, comme ceux de Pontfure: mais de rentrer dans Cazal. On dit que les ennemis perdirent deuant ceste place quatre ou cinq cens hommes, & les nostres pour le plus vne vingtaine.

Durant le temps de ces petits sieges M. de

Toyras fit en tres-grande diligence paracheuer les dehors qu'il auoit commencez, tant à la Citadelle qu'à la ville de Cazal, & à ces fatigues ne s'espargnoient nullement tous les Seigneurs & Capitaines, lesquels portoient tous la hotte, depuis M. le Duc de Mayène, iusques au moindre de tous les Officiers.

En ce temps aussi M. de Toyras voyant les hommes qu'il auoit perdus par la reddition de Pontfure & autres lieux, fit faire vn Regiment nouueau de ceux du Montferrat, sous le bon plaisir du Roy & de Monseigneur le Cardinal.

Enfin le 23. de May. le Marquis de Spinola avec toute son armee, fit ses approches pour assiéger Cazal, & M. de Toyras sortant avec toute sa Caualerie, & la diuisant en huit ou dix escadrons, & avec quelques trois ou quatre cens mousquetaires luy alla au deuant, & l'escarmoucha si à propos & aduantageusement, que l'ennemy y perdit quatre ou cinq cens hommes, & fort peu des nostres y furent tuez, quoy que le combat durast plus de huit heures, si biẽ les nostres auoient esté disposez.

Le lendemain, & les suiuians, les nostres continuèrent quelques legeres escarmouches, & l'ennemy s'occupa principalement à dresser les tranchees, & esleuer des forts.

Le 26. nous perdimes le Fortin, qui estoit au delà du Po, à trois heures denuict, où la Poujade & du Tronchart, Capitaines du Regiment de Riberac, y firent des merueilles de se bien deffendre, quoy que le Fort ne fut encores en



deffense. La Poujade y fut tué, & Tronchant  
bleffé & pris; les nostres y furent cruellement  
traitez par les ennemis, ainsi qu'on le recognut  
le lendemain, que M. de Toyras enuoya de-  
mander les morts: car ils les renuoyerent avec  
les bleffez tous nuds & mal accommodez.

Le 28. de May M. de Toyras voyant que les  
Milanois auoient esleué vn Fort dans la plaine  
à trois cens pas de la Citadelle, sortit avec 60.  
Maistres, conduits par Canillac, Boissac, & S.  
Aunez, pour enleuer à la main gauche vn Fortin  
del'ennemy, & coupper le chemin aux fuyards,  
& quelques cent ou six vingts mousquetaires  
pris de tous les Regiments, & executa si heu-  
reusement son dessein, qu'en moins d'un quart  
d'heure plus de deux cens hommes furent tail-  
lez en pieces, avec quelque quarante Officiers,  
& à peine y perdismes nous vn homme. Mon-  
sieur de Montosier y fut bleffé, M. le Comman-  
deur de Souuré y perdit son cheual, qui fut tué  
sous luy. Et M. de Boissac y fit si vaillamment,  
qu'ayant avec luy quelques Caualliers, & six  
mousquetaires, il soustint l'effort de trois esca-  
drons de Caualerie qui venoient pour attaquer  
les nostres. A ceste defaite se trouua vn Pere  
Recolet, François, qui exerça des charitez loia-  
bles à l'endroit des ennemis, en leur baillant des  
absolutions comme ils mouroient.

En suite de ceste glorieuse action, on sceut par  
ceux qui furent pris prisonniers les desseins que  
les ennemis auoient touchât les batteries qu'ils  
vouloient faire, & comme les Napolitains &



Tarantins se chargeoient de l'attaque de la ville du costé du Chasteau, & les Allemans, Espagnols; Milanois, Lombards, & autres Italiens prenoient à tasche les deux attaques de la Citadelle. Et le dernier de May les ennemis ayant esleué leur batterie sur la poincte de la coline, commencerent à faire iotier leur canon.

Le 4. de Iuin Monsieur de Toyras se preparant à faire vne sottie contre les Napolitains, en fut diuertý, parce que l'on surprit vn garçon qui en aduertissoit les ennemis, par vn signal que le garçon leur donnoit avec vn mouchoir attaché au bout d'un roseau, lequel estant pris en accusa vn Italien appelé le Capitaine Gambere, lequel descouurit la trahison qui estoit dans la ville, & M. de Toyras le bailla à M. du Mayne pour le faire punir, qu'il le fit mettre dans vne basse fosse.

Depuis la descouuerte de ceste trahison M. de Toyras deffendit qu'on sonnat plus les cloches, pour frustrer les traistes de donner aucuns aduis par le son d'icelles. Et commandement fut faict aux Capitaines de faire incessamment tirer chacun en sa poste, pour empescher l'aduancement du trauail des ennemis.

Le 5. de Iuin, les ennemis tascherent avec deux couleurines qui estoient dans le Fortin de là le Po, d'incommoder les moulins de Casal, mais en vain. Et le mesme iour M. de Toyras par 20. hommes du Regiment de Pompadour, conduits par le sieur Doignon Enseigne, & par vn Sergent, fit brusler les gabions que les enne-

mis auoient portez la nuit pour dresser leurs Forts, ces 20. hommes sortirent par la porte de la Citadelle, laquelle va au dehors.

Le 8. Iuin M. de Toyras fit sortir par le mesme endroit quelques quatre-vingts hommes du mesme Regimēt, la moitié desquels estoit commandee par des Sergens, & le reste par les Capitaines Sabot, Loberie, & Chasteau-Gaillard, & ainsi se rendirent maistres de leurs tranches iusques à leurs premiers Forts, tuant ceux qui resistoient, & chassant les fuyards, il ny demeura que deux des nostres, & les ennemis y perdirent quarante de leurs meilleurs hommes.

Le 9. ce fut bien autre ieu : car M. de Toyras faisant sortir par la porte du Chasteau toute sa Cauallerie, & trois ou quatre cens hommes de son infanterie, au sortir de la garde chargea si à propos & si hardiment les Napolitains, qu'il leur tua quelque trois cens hommes, & mena prisonnier dans Cazal leur Chef le Marquis de Quinquinella, quoy qu'il se fut vaillamment defendu, & qu'il fut fort blessé ; ce combat ne dura pour le plus qu'une demie heure, & la plus part des Officiers des ennemis y furent tuez ; nous y perdismes quelques huit Caualliers, & dix ou douze soldats pour le plus. Les ennemis resterent grandement estonnez, & ne sçauoient de quel costé aller ; car en mesme temps M. de Pompadour & M. de la Tour avec ses mousquetaires firent vne sortie du costé de la Citadelle, & l'ardeur des nostres fut si grande, que Charles de Hamel seigneur d'Helincourt, Sain-

te Marguerite, donna iusques à la place d'armes des ennemis, & fut là tué en la presence du Marquis de Spinola.

Le 10. mondit sieur de Toyras commanda à vn Sergent de Pompadour de faire vne petite sortie avec quelques 20. hommes, le commandement ne fut pas si tost donné qu'ils sauterent dās les tranches des ennemis, leur firēt quitter leurs trauaux, & en tuerent vne vingtaine, & rapporterent les outils & armes.

Le lendemain fut fait encores vne sortie de quelques cinquante hommes qui allerent iusques aux gabions des ennemis, les renuerferent, & tuerent quantité grande de soldats, avec petite perte des nostres.

Le Soleil va tousiours son train ordinaire, & sa beauté n'est iamais inefgale, mais elle ne sçauroit empescher qu'au deffous de ce bel astre il ne s'y fasse bien souuent du desordre. Le Roy de mesmes va tousiours au bien & à la gloire de ses armes, Monsieur le Cardinal & les plus hauts Ministres de l'Estat donnent à temps & lieu excellemment les ordres qu'il faut donner: mais en l'execution de ce qu'ils ordonnent, il s'y trouue tant de sortes de souplesses, que bien souuant il ne se fait rien de ce qui deuoit estre plus tost fait que dit, ce malheur arriua pour lors à Cazal: car M. de Toyras n'ayant aucun argent, celuy que Monseigneur le Cardinal luy auoit baillé luy mesme ayant esté tout employé en achapt de bled & autres viures, à la place de ceux que M. de Sauoye deuoit fournir, il fit pre-



mièrement fondre toute sa vaisselle d'argent & en fit battre de la monnoye pour continuer les prests de la soldatesque, & pour fournir aux fins des traux qu'on fait faire continuellement, & tout l'argent estant failly il fit battre de la monnoye de cuiure, à laquelle il dōna la valeur qu'il luy pleust, faisant obliger des plus riches Marchands de Casal de reprendre toute sa monnoye de ceux qui l'auroient pour le prix qu'elle auroit esté receuë, & mondit sieur de Toyras s'obligeant pour le Roy, & en son nom à l'indamnité des Marchands. D'un costé de ceste monnoye les armes de France estoient empreintes, & de l'autre un petit trophée d'armes avec ces mots : *NEC VI, NEC FRAUDE*, qui quitestmoignoit aux ennemis que les François ne pouuoient estre vaincus ny par force, ny par finesse. On dit que quand on a retiré ceste monnoye de cuiure qu'il s'en est manqué pour dix ou douze mil liures, que les Italiens, Allemans, & Espagnols, ont retenu pour leur seruir de reliques tres-precieuses contre la peur.

Il ne se passoit ianais de iour ny de nuit que les nostres ne fissent quelques entreprises & galanteries sur les ennemis, mais le 13. de Iuin il s'en fit vne sur les Napolitains & les Espagnols naturels & leurs bruslerent tous leurs gabions, & tuerent quantité d'hommes sans perdre que deux ou trois des nostres. Et vne heure apres, M. de Toyras apres auoir fait pointer toute son artillerie à la lueur du feu, leur fit donner vne faulx allarme pour les faire mettre en bataille,

puis



puis descharger son artillerie sur eux, ce qui luy reüssit avec vn heur indicible, & vne perte singlalee pour les ennemis.

Nostre Caualerie n'estoit iamais inutile, car outre qu'elle nous gardoit nuit & iour vne plaine en laquelle passoient nos cheuaux & nos bestes, il ne se passoit gueres de iours que les nostres ne fussent aux prinſes avec l'ennemy.

Enuiron ce temps les viures commencerent fort à se diminuer, & ce particulièrement, parce que M. de Toyras fut contraint de faire donner du pain de munition à tous les habitans de la ville qui vouloient seruir & porter l'espee, sans lequel ordre la pluspart de ces manans se fut ietee dans l'armee des ennemis.

Le 24. Iuin la Caualerie des ennemis vint encôres iusques à la Tenaille, où la nostre s'estant presentee pour luy faire teste, l'attaque y fut chaude & de longue duree, il y en demeura huit ou dix des ennemis, & trois prisonniers qui furent menez dans Cazal; La compagnie de M. de Boissac y fit des merueilles.

L'ennemy ne cessoit d'aduancer son trauail, fortifiens leurs tranches d'une façon extraordinaire pour se couurir de la furie de nos canons, & estoient desia si auant, qu'ils entouroiênt de toutes parts la demie lune des mousquetaires. M. de Saint Aunez, Lieutenant de la Compagnie de M. de Toyras, & qui a espousé vne de ses niepces, sortit dehors, & tua dans la pointe de la tranchee d'un coup de pistolet celuy qui estoit le premier aux trauaux, & à l'exemple de

son courage plusieurs Caualliers en firent de mesmes.

Le iour Saint Pierre 29. de Juin, Messieurs de Barada, de Souuré, & autres Seigneurs, estans allez apres le souper sur la demy-lune des mousquetaires, & là dansé & beu à la santé des Princes Chrestiens & du Marquis de Spinola, à peine leur galanterie fut acheuee, que les ennemis firent iotier deux mines ou fourneaux, à la premiere desquelles nous perdimes dix ou douze hommes, à la seconde les ennemis y perdirent vne trentaine des leurs, mais les mines ayant iotié, les nostres leur firent quitter la place, & le sieur de Tersillac qui estoit à M. le Commandeur de Souuré y fut tué d'une mousquetade.

Il ya eut tel bastion entelle demie lune, pour laquelle gagner & deffendre on y a fait iotier, soit de la part des ennemis, soit de la nostre, plus de quatorze fourneaux, & les nostres au lieu de perdre de leurs postes gaignoient presque tous-jours quelque terrain sur les ennemis, on estoit perpetuellement aux mains, soit de iour, soit de nuit.

Et n'y a rien de plus vray qu'à l'exemple du Chef tout le reste se forme, nul ne peut estre que vaillant, quand le Capitaine en sert d'exemple. M. de Toyras est si heureux à glorieusement seruir le Roy, que les filles mesmes deuiennent des Amasones. A l'Isle de Ré vn Soldat fit l'action d'un poisson pour l'amour de luy, & dans Cazal, vne ieune fille aagée de vingt ans s'est

renduë vn très-bon soldat, & a esté souuent & heureusement à l'escarmouche contre les ennemis, a tué plusieurs Espagnols, & y ayant esté bleffée, estant guerrie ne laissa pas de continuer les effects de sa valeur, aussi tiroit elle la paye d'un soldat.

Sur le commencement du mois de Iuillet la caualerie de l'ennemy diuisee en plusieurs escadrons, semit en deuoir de pouffer la compagnie du sieur de Boissac, lequel estoit lors malade d'un coup de mousquet qu'il auoit receu à la iambe, mais les nostres tindrent ferme, & nous conseruerent le bestial que l'ennemy nous vouloit enleuer de la plaine.

Le 2. Iuillet les ennemis mirent le feu à vn fourneau qu'ils auoient fait sous la demie lune des mousquetaires, mais ce fut sans effect.

Le 5. de Iuillet au matin les ennemis firent iouer vne mine sous la demy-lune du bastion Sainct Carle, laquelle nous engloutit dix de nos Soldats, mais Monsieur le Comte de Riberrac qu'il la deffendoit, sauta avec les siens dans les ruynes de la mine, reprit la mesme poste & en repoussa les ennemis qui s'estoient presentez tous armez, avec rondache & coutelas à la main.

Le soir venu les ennemis firent iouer quantité de perriers & autres machines à ietter grosses pierres, qui ne firent pas grand mal: mais en tombant les caillous entroient plus d'un pied & demy en terre.

Toutes les nuits se passoient à ietter grena-



des & pots à feu, & coups' de pierre de par & d'autre, avec railleries & inuectiues perpetuelles, comme estant les vns placez à six pieds des autres, & ce qui plus espouuentoit les ennemis, estoit la hardiesse continuelle des nostres à sauter dans leurs tranches, & y tuer quantité de Soldats, à quoy Messieurs de Souuré, de Barada, de Saint Aunez, estoient si coustumiers & avec tant de bon-heur, que les pauvres Espagnols ne pouuoient iamais estre en repos.

Le 6. de Iuillet sur le Midy, les ennemis/commencerent à ouurir le fossé ou contre-escarpe de la demy-lune des mousquetaires avec vne mine, laquelle emporta vne grande partie de la palissade qui la fermoit, les nostres en garderent encore vne partie, apres en auoir chassé les ennemis avec grenades & pots de feu.

Le 8. à 3. heures apres Midy M. de Toyras fit sortir cinquante soldats de la demy-lune de Pompadour, & pareil nombre de celle des mousquetaires, lesquels donnant en mesme temps sur les tranches des ennemis avec grenades & pots de feu mirent en fuitte les ennemis, en tuerent plusieurs, & y perdirent vn seul soldat qu'ils rapportèrent.

Le 13. à 11. heures du matin M. de Toyras fit mettre le feu à vn fourneau qu'il auoit fait faire à la pointe de la demy-lune de Riberac, par lequel grand nombre des ennemis furent tuez, & leurs tranches ruynées.

Le 14. les ennemis en firent iouer vn autre contre la mesme demy-lune, lequel ayant fait



son effect sur eux, les nostres sauterent promptement sur les ruynes de la mine l'espee à la main, & firent vn logement sur les tranches des ennemis, qu'ils garderent.

Enfin la mine que nous auions faite à la demy lune du bastion de Sainct George ayant esté euuantee, soit par trahison, soit par la diligence continuelle des ennemis, ils s'en rendirent les maistres, les nostres n'ayant plus de terre pour se couvrir. Celle que M. de Ribera deffendoit à la pointe du bastion de Sainct Carle, estoit tous les iours disputee à coups de picque, & la demy-lune que Pompadour gardoit restoit entiere entre les deux bastions attaquez, à sçauoir entre celui de S. George & de S. Carle.

Pour l'attaque qui se faisoit du costé du Chasteau nous y estions aussi aux mains, & à l'attaque de la ville, qui se faisoit du costé des Trois Vents, les Napolitains & Tarantins s'en estoient aussi fort approchez, & s'estoit le costé qui nous donnoit le plus de peine, & laquelle estonnoit le plus les habitans de la ville: mais M. de la Grange y donna si bon ordre, que sur la fin il n'y auoit plus rien à craindre.

Le 19. Iuillet au point du iour, nous fusmes saluez d'environ cinquante volces de canon, des douze pieces qui estoient en batterie dans les fortins des ennemis, pour ruyner les deffenses de nos deux bastions qu'ils attaquoient.

Le soir de ce mesme iour les ennemis s'amusoient à faire des feux de ioye de la prise de Mantoue, mais sur la minuit Monsieur de Toyras

pour leur ayder fortir avec sa compagnie de chevaux legers, celle de M. de Canillac, & celle de M. de Minjeu, commandee par le sieur de Soulas, & chargea si à propos les Napolitains & Tarantins aux forts & batteries des Trois Vêts, qu'il se redit le maistre, & par le feu fit consumer leurs forts & batteries, les ennemis y perdirent quelque cinquante hommes, pour arrouser de leur sang leurs feux de ioye, M. le Baron de Canillac y perdit vn œil d'un coup de mousquet, apres auoir vaillamment combatu, M. de Charlieu y fut blessé d'une mousquetade au trauers des cuisses, & le Trompette qui donnoit le signal de l'attaque tomba mort d'une mousqueta de aux pieds de M. de Toyras.

Le 20. le Marquis de Spinola demanda trefue pour retirer ses morts qui estoient en assez bon nombre, laquelle M. de Toyras luy accorda, & dura deux heures.

Le 21. sur les deux heures apres Midy les ennemis firent ioier vn fourneau à la demy-lune de Riberac, laquelle fit presque tout son effect contre eux mesmes, les Espagnols parurent environ cinquante armez de toutes pieces pour donner l'espee à la main, mais les nostres les ayans repoussez plus de vingt pas, firent aduancer des chevaux de frise, & gaagnerent trente ou quarante pas de terre sur les ennemis, & y firent vn logement qu'ils garderent.

Le 23. de Iuillet M. de Toyras fit mettre le feu à deux fourneaux qu'il auoit fait à ladite demy-lune de Riberac, & en mesme temps sortit

sur les ennemis, lesquels ils battirent, & gagnèrent sur eux mesme aduantage qu'ils auoient desia gagné, & M. de Toyras loüa grandement le Chef & les soldats de leur vaillâce & adresse.

Le 28. au matin les ennemis donnerent le feu à vn autre fourneau à ladite demy-lune, qui fit quitter vn logement aux nostres, mais ils le reprirent tout à l'heure.

Ce mesme iour M. de Toyras à 3. heures apres Midy fit mettre le feu à vn fourneau qu'il auoit fait faire à ladite demy-lune de Riberac, & quelque peu de temps apres commanda qu'on mit le feu à vn baril de poudre pour feindre qu'il y eut vne seconde mine, & seruir aux nostres de signal pour donner sur les ennemis, ce qui fut executé par M. le Comte de Riberac, la Garanne, S. Trail, & quelques autres Officiers suiuis de 50. hommes, avec tel aduantage, qu'ils firent vne petite demy-lune de trente pas de largeur sur le terrain des Gaigné, & & ainsi les assaillâs auoient peine de se deffendre.

En ce temps les ennemis commencerent à ouurir le fossé du costé des Allemans, vis à vis du bastion de S. George, & dresserent plusieurs batteries pour en ruiner les deffenses & les flancs d'embas. Mais M. de Toyras fit si promptement trauailler aux retranchements des bastions attaquez, qu'il rendit tous leurs desseins comme inutiles.

En ce mesme temps, & sur la fin du mois de Iuillet, M. le Cheualier de Barry, Cornette de la compagnie de M. de Toyras, & frere de M.



de S. Aunez, estant en garde fut tué d'un coup de carabine à vne escarmouche de la caualerie, & fut grandement regreté à cause de sa valeur, & M. de S. Aunez, son frere, fut blessé d'une mousquetade au quartier des Trois Vents.

Le 3. iour d'Aoust les ennemis ayant entrepris avec quantité de gabions de se loger entre les pointes des demy-lunes de Riberac & de Pompadour, en furēt repoussez & leurs gabions bruslez, & beaucoup des leurs tuez.

Le mesme iour du costé des Trois Vents, les ennemis battirent avec douze canons si furieusement la ville, que les habitans d'icelle deputerent des gens pour prier M. de Toyras de faire quelque composition pour ladite ville, mais on y donna vn si bon ordre par les soins de M. de la Grange, qu'ils n'eurent plus de peur.

Le 6. Aoust M. de Toyras fit donner le feu à vne de nos mines à costé de la demy-lune de Riberac, qui fit vne grande ouuerture, & nous donna vingt pas de terrain, & ce mesme iour les nostres mirent le feu aux gabions que les ennemis auoient aduancez sur le bord du Po au quartier des Trois Vents, & le sieur de la Fontaine, Cavalier de la compagnie de M. de Toyras, s'y porta vaillamment, cōme à plusieurs autres pareilles occasions.

Le 7. M. de Toyras fit brusler la batterie que les ennemis auoient faite vis à vis du bastion S. Carle, laquelle ne se pouuoit reparer de dix iours.

Le 9. veille de S. Laurens, à vne heure de nuict,



nuiet, les Espagnols ayant ouuert le fossé, & passé deux galleries pour les attacher au bastion S. George, M. de Toyras les fit entierement brusler par ledit sieur de la Fontaine, suiuy des plus hardis, & notamment des mousquetaires de M. de la Tour. Et les ennemis en ce temps dresserent vne batterie de douze canons dans le fossé du bastion S. George.

Le 14. Aoust, à la veille de la Nostre Dame, M. le Baron de Chefny, de la maison de Harlay, & nepueu de M. de Chamvalon, avec trois Ceualliers habillez à l'Allemande, ayant passé par l'armee de Spinola, & y ayant seiourné quelque temps, se rendirent heureusement dans Casal, & y arriuerent fort à propos pour encourager les assiegez qui estoient grandement trauaillezz de la peste, & languissans apres les nouuelles du secours, & par sa venue furent tous resiouïs.

Depuis ce temps les Espagnols ne cesserent d'essayer d'attacher leurs galleries au bastion de S. George, mais en vain, car on les leur brusloit tousiours, & lors le Baron de Liury, Cavalier volontaire, y receut vne mousquetade dans le bras, & s'est tousiours trouué à toutes les sorties, y en ayant eü plus de soixante grandes ou petites, sans les attaques perpetuelles qui se faisoient de iour & de nuit, depuis que les ennemis furent dans les fosses des demy-lunes.

Le 20. d'Aoust les ennemis par vn excez de courage bruslerent l'vn de nos mantelets au quartier des mousquetaires, les nostres leur ont souuent fait de pareils exploits.

Le 25. les ennemis attaquèrent la demy-lune de Pompadour, mais en vain, car ils n'y réussirent pas.

Le 29. M. de Toyras fit donner le feu à vn fourneau de la demy-lune de Riberac, lequel ayant renuersé la terre sur les ennemis, donna moyen aux nostres de faire vn logemēt sur leurs tranches, & recula leur trauail de plus de dix iours. Et ce mesme iour le sieur de Boissac poussa la Cauallerie del'ennemy iusques dans leurs Forts, & tous les iours leur Cauallerie & la nostre estoit aux mains.

Le 7. iour d'Octobre, ou le 8. M. le Marquis de Bresé arriua dans Cazal de la part de Messieurs les Generaux del'armee de sa Majesté, avec la trefue qu'ils auoient faite iusques au 15. d'Octobre, & mondit sieur le Marquis trouua les assiegez en tel estat, qu'ils pouuoient attendre les commoditez de sa Majesté encores deux mois, mais ils obeyrent à ce qui auoit esté conclu par ceux qui auoient le pouuoir de ce faire. Et M. le Duc du mayneurant la ville & le Chasteau aux Espagnols au nom del'Empereur, M. de Toyras & les siens se retirerent dans la Citadelle, en attendant vne paix generale ou vne continuation de la guerre, conformément aux articles de la trefue.

Le 15. iour d'Octobre venu d'autant que dans quinze iours apres il falloit secourir Cazal ou souffrir que M. de Toyras rendit la Citadelle suiuant les articles de la trefue. Toute l'armee s'achemina dans la plaine Descarnafix pres

Saluces, qui estoit le rendez-vous general qui auoit esté donné, & le tout en tres-bon ordre & equipage, tant pour les viures que pour les autres choses necessaires.

Le 16. fut employé pour mettre l'armée en bataille, laquelle fut diuisee en trois corps les plus esgaulx que l'on peut, chacun desquels eut vn mareschal de France pour Chef, avec tel ordre que chaque iour messieurs les mareschaux changeroient de corps, & que celuy qui commanderait la bataille seroit le Souuerain tout le iour de son commandement.

L'auant-garde fut composee de six mille hommes de pied & huit cens cheuaux, l'arriere-garde à peu prez de pareil nombre, & la bataille plus forte de deux mille hommes & de toute la Noblesse de Dauphiné, qui faisoient quatre cens cinquante maîtres, commandez par M. le Comte de Saux.

Le 17. iour d'Octobre, qui fut le premier iour que l'armée marcha. M. le mareschal de la Force comme le plus ancien mareschal, voulut commander l'arriere-garde, M. le mareschal de Schomberg prist l'auant-garde, & M. le mareschal de marillac la bataille avec cet ordre; que le corps qui auroit marché vn iour à l'auant-garde marcheroit le lendemain à l'arriere-garde, & l'arriere-garde à la bataille, & ainsi consecutiuellement pour reprendre tousiours vn mesme ordre de trois en trois iours.

messieurs de Fequieres & Franchipany, mareschaux de Camp, & les sieurs de la Haye &



Beaufregard, Aydes de Camp, furent choisis pour estre sous M. le mareschal de Schomberg.

Messieurs de Chastelier Barlot & marquis de Brayzé mareschaux de Camp, & les sieurs de Rogles & de Bosque, Aydes de Camp, sous M. le mareschal de Marillac.

Monsieur le Vicomte d'Arpajon mareschal de Camp, & les sieurs de la Fitte, du Fraische, & le Vijan, Aydes de Camp, sous M. le mareschal de la Force.

Quand aux sieurs du Plessis, de Bezançon, & de Vignolles, aussi Aydes de Camp, ils furent destinez pour estre ordinairement à la teste de toute l'armée avec les deux cens mousquetaires qui leurs estoient ordonnez pour soutenir les trauailleurs qui seruoient à ouurir dans les champs de chemins nouueaux aux gens de guerre, pour marcher au moins dix hommes de front, à fin que les chemins ordinaires ne seruissent qu'aux viures, à l'artillerie, & aux bagages, & que par ce moyen l'armée peust marcher avec plus d'ordre & de diligence: ce qui a esté punctuellement executé pendant le voyage.

Monsieur d'Argencourt, Sergent de bataille, n'eust point de place affectée, d'autant que sa charge l'obligeoit d'estre tantost à la teste, & tantost à la queuë de l'armée, pour faire marcher les troupes dans l'ordre qui leur estoit prescrit.

Pour le sieur de la Nouë, qui faisoit la charge de mareschal des logis de l'armée, il estoit ordinairement aupres de celui qui commandoit

la bataille & fournissoit de Fourriers aux autres mareschaux de France pour les autres corps de l'armee. Et sur le tout monsieur d'Estampes estoit Intendant de la Iustice & des Finances, & m. d'Emery eut le principal soin des viures.

Avec cét ordre l'armee du Roy partit du rendez-vous general le 17. Octobre de la presente annee 1630. & s'en alla camper aux environs de Raconis, faisant ce iour là sept grands milles de chemin, & laissant encores prez de huit mil hommes de pied & mille cheuaux autour de Turin, sous la charge de m. le marquis de Tauane mareschal de Camp, pour s'opposer à mōsieur de Sauoyes'il se mettoit aux champs.

Le 18. l'armee campa à Someriue del Bosc, le 19. elle s'arresta à Cezizolles, & le 20. elle fit sa demeure à Canalle, où messieurs les mareschaux de France receurent les nouuelles du traicté de Rartisbonne de la part de m. de Leon par le sieur de S. Estienne, & encores par le sieur mazariny.

Sur ceste nouuelle messieurs les mareschaux s'estans assemblez & voyant que ce nouveau traicté estoit du tout contraire aux intentions du Roy pour le faict de Casal, ils se resolurent de poursuiure leur voyage & se tenir aux conditions de la trefue faite en Italie, & pour cét effect prierēt le sieur mazarini de sommer de leur part le Comte de Colalte qu'il eut à se retirer avec ses troupes Imperialles hors de l'armee Espagnolle, d'autant qu'il n'y auoit que les armes d'Espagne qui se peussent opposer aux armes de

France en ce voyage : fuiuant les articles de la fufditetrefue.

Le 21. l'armee campa prez d'Aft, & le 22. par delà ceste ville d'où il fut tiré quelques volees de canon fur elle en paffant.

Le 23. l'armee fe logea à la Serre, village du montferrat, apres auoir paffé prez de deux mille dans l'Eftat de milan, & là le fieur mazarini fe rendit avec auffi peu de fruiët de fes fatigues, cōme à tous fes autres voyages.

Le 24. l'armee campa à Cuquarro & à Froubine, & le 25. toute l'armee alla camper à Occimiano à quatre mille de Casal, où l'on refolut que le lendemain on iroit aux ennemis du costé de la plaine, parce que leurs trauaux y estoient moins acheuez, à quoy ils ne s'attendoient point.

Le 26. l'armec marcha droit au bourg S. Martin, & de là passa le canal du torrent Gatola, & apres auoir gaigné la plaine descouuerte, fut mise en bataille à la veuë de l'armee des Espagnols, & fans marchander alla vers leurs retranchemens dans le plus bel ordre, & avec la plus grande resolution qui se puisse imaginer.

Comme elle fut à mille pas des ennemis, on disposa les trouppes selon ce qui auoit esté resolu pour l'attaque. M. le Marechal de la Force auoit ce iour l'auant-garde, M. le Marechal de Marillac l'arrieregarde, & m. le marechal de Schomberg la bataille, & ainfi auoit le commandement sur toute l'armee.



L'armee estant en cét ordre composee de dix-huict mil hommes de pied , deux mille trois cens cheuaux sous Cornette, & quatre cens cinquante Gentils hommes du Dauphiné, sans comprendre les Officiers de caualerie ny d'infanterie. Les sept bataillons qui faisoient l'auant-garde du combat destacherent leurs enfans perdus, au nombre d'environ deux cens, tant picquiers que mousquetaires de chaque bataillon , qui s'aduancerent quelques cent par deuant tout le reste; & estans arriuez aux vieux retranchements qui auoient esté faits au temps du premier siege, esloignez des nouueaux dela portee du mousquet seulement. On fit alte pour se mettre à genoux & faire la priere, & les soldats estans releuez ils furent exortez à bien faire , mais ils estoient en si bonne humeur à la presence des ennemis , qu'ils n'auoient aucun besoin d'exhortation.

Sur ses entrefaites Picolomini avec quelques Carabins , s'estans aduancez plus pour recognoistre nostre armee, que pour combattre , il y en eust quelques volontaires des nostres qui furent à eux, avec lesquels il y eut quelque legere escarmouche, Picolominý y eut vn cheual tué sous luy, & nous y perdismes le sieur de marcilly, qui pour s'estre trop aduancé y fut tué d'un coup de carabine.

Le iour estoit le plus beau qu'on eust sceu desirer, & les allees & venuës du mazarini, fort frequentes à cause du voisinage des deux armees, & neantmoins tousiours fort inutiles aussi bien

que les precedentes.

L'on estoit si près de ioindre les ennemis, qu'on pouuoit facilement voir leur ordre qui paroissoit fort beau derriere leurs retranchements, & voyoit on assez clairement qu'ils estoient aussi forts de l'infanterie que les François, & beaucoup plus de cauallerie, & si on croit à ce qu'ils en ont dit eux mesmes, ils auoient vingt-cinq mil hommes de pied, & six à sept mille cheuaux.

Monsieur de Toyras voyant nostre armee en estat de combattre, estoit sorty de la Citadelle avec deux cens cinquante maistres, & cinq ou six cens hommes de pied, & ne faisoit qu'attendre le commencement du combat pour faire ce qu'il eust estimé le plus à propos, mais les ennemis auoient laissé des troupes de cauallerie & infanterie pour s'opposer à ses efforts s'ils eussent peu.

Enuiron les trois heures apres Midy le commandement fut donné à nostre armee d'aller droit aux ennemis; Alors la cauallerie mit l'espee & le pistolet à la main, tous les Officiers de l'infanterie mirent pied à terre, & toute l'armee marcha d'un temps & d'un pas esgal droit à leurs retranchements, avec tant de resolution & de gayeté, que les coups de canon que les ennemis tirerent ne peurent apporter aucune confusion parmi les soldats, ny faire passer aucun visage; au contraire ils sembloient en marcher plus resolument.

Sur ceste resolution, messieurs les mareschaux

chaux de France estans encores à la teste des premiers bataillons , comme l'on alloit tous-jours en auant, les ennemis ( soit pour la crainte qu'ils auoient des François , ou par consideration d'Estat , ne voulant rien hazarder , ou pour quelques necessitez à nous incogneuës ) tefmoignerent tout d'un coup n'auoir point d'enuie de combattre , mais plustost de donner aux armes du Roy la satisfaction & l'honneur qu'elles pouuoient souhaier , & pour cét effect enuoyerent en diligence le sieur Mazariny vers M. le Marechal de Schomberg , comme à celuy qui commandoit l'armee ce iour là ; & qui outre cela tenoit en Italie la principale clef des volontez du Roy , pour luy offrir de la part du Marquis de Sainte Croix , ce qu'il auoit tousiours refusé iusques là.

L'on accepte les propositions du sieur Mazarini , & pour les executer fut aduisé que le Marquis de Sainte Croix , avec les principaux chefs de son armee , iusques au nombre de trente , sortiroient de leurs retranchemens , & Messieurs les Marechaux avec pareil nombres auanceroient aussi hors du corps de l'armee du Roy pour aduiser ensemble aux seuretez qui se pourroient prendre de part & d'autre.

Incontinent apres, on vit sortir du retranchement des ennemis le Marquis de Sainte Croix, Dom Philippes Spinola general de la Caualerie, le Duc de Lermes general de l'Infanterie, le Duc de Nochera maistre de Câp , le Comte de Serbelon general de l'Artillerie; & le reste ius-



ques à tteinte des plus honnestes gens de leur armee. Et les Generaux de l'armee du Roy s'aduancerent au mesme temps en pareil nombre, & faisoit fort bon voir ceste entre-veuë de tant de personnes de qualité armees de toutes pieces, à la veuë de deux grandes armees, pout decider vn different le plus important de toute la Chrestienté.

Les ambrassades reciproques receuës de part & d'autre, & les complimens acheuez, on demeura d'accord; Que le traitté faict à Ratisbonne seroit entierement suiuy, excepté pour le regard de Casal. C'est à dire, quel'Empereur enuoyeroit l'inuestiture du mantouian, & du montferrat à monsieur de Mantouë, apres auoir receu de luy vne lettre de submission, des termes de laquelle l'on estoit desia demeuré d'accord: Que les Valtolins, & les Grisons seront remis en leur premiere liberté, & les forts qui pourroient auoir esté faicts en leurs pays rasez: Qu'en attendant l'execution de tout cela, les armes du Roy demeureroient en Italie, sans qu'il fut rien rendu à M. de Sauoye de tout ce qui a esté pris dans ses Estats, que toutes choses ne fussent plainement executees.

Et que pour Casal les ennemis sortiroient le lendemain de la ville & du Chasteau, & generalement de toutes les places du Montferrat: & que leur armee se retireroit par l'autre costé du Po dans le Milanois, & l'armee du Roy vers Salusse, Veillane, & Pignerol, par le chemin qui luy seroit le plus commode.

Qu'il demeureroit vn Commissaire de la part de l'Empereur avec son train seulement dans la ville de Casal, pour y donner le mot attendant l'inuestiture, & que pendant ce temps il n'y pourroit demeurer aucunes troupes Françoises au nom du Roy.

Toutes choses ainsi resolues l'armee du Roy fit demy tour à droict & vint prendre les logemens de Fessine, du Po, du Bourg S. Martin, & d'Occimiane, à vn mille du trauail des ennemis, & celle des Espagnols demeura en bataille dans leurs retranchements.

Monsieur de Toyras voyant toutes les choses pacifiees, demanda permission au marquis de Sainte Croix d'aller voir ses liberateurs pour leur rendre ses deuoirs, & permission aussi de voir l'armee ennemie, ce qui luy fut aussi tost accordé, & luy fut enuoyé des Gardes du marquis pour le conduire par leur armee, laquelle estant toute en bataille, & sçachans que ce brave Capitaine les venoit visiter le receurēt gayement, & luy rendirent les mesmes honneurs qu'ils eussent rendus à vn Empereur, s'il y fut venu en personne; & ainsi il passa iusques à l'armee du Roy, où il fut reçu avec mille & mille carresses de messieurs les mareschaux, & de tout le reste. Puis s'en retourna dans Casal.

Le 28. les ennemis s'occupèrent à retirer leurs canons & munitions de la ville & chasteau de Casal, & à se preparer à leur depart.

Le 29. ils se retirerent vers Vallame & Alexandrie, qui sont les deux premieres places de

l'Estat de milan.

Le 30. messieurs les Generaux de l'armee du Roy furent dans la Citadelle de Casal, & demurerent dans la ville à cause du mauuais temps, iusques au premier de Nouembre de l'annee presente 1630. qu'ils en partirent, laissant Casal apres auoir pourueu aux necessitez de ce qu'il y falloit faire au pouuoir de monsieur le Duc du mayne, pour y commander à l'absence de Monsieur son pere, & Monsieur de Toyras voyant le tout en seureté s'en est reueni en France pour rendre compte à sa Majesté de tout ce qui luy auoit esté mis en charge & qu'il a glorieusement conserué.

Voila de quelle sorte le plus hardy secours qui se soit iamais entrepris, a esté glorieusement executé par les armes du Roy, & par les soins extraordinaires & preuoyances de ce grand Cardinal, ayant à surmonter les difficultez que luy pouuoient opposer, la peste, la famine, & toutes les puissances de l'Empire, d'Espagne, & de Sauoye, iointes ensemble en ceste occasion.

Du depuis, le 19. & 20. de ce mois de Decembre Monsieur de Montmorency, Duc & Pair de France, & mondit sieur de Toyras, furent par sa Majesté faits Mareschaux de France, avec l'applaudissement vniuersel de tout le monde, & en la presence de mondit seigneur le Cardinal.



**I**L est permis à IEAN DE LA  
TOVRETTE Marchand Li-  
braire de faire imprimer, vendre &  
debiter l'*Histoire iournaliere de tout ce*  
*qui s'est passé dans le Montferrat pour*  
*la protection de Monsieur le Duc de*  
*Mantouë, &c.* & deffences à tous  
autres Imprimeurs & Libraires de  
l'imprimer.

The following is a list of the  
 names of the persons who  
 have been appointed to the  
 various offices of the  
 Library of the University of  
 Toronto, for the year 1877.  
 The names are given in the  
 order in which they were  
 appointed, and are followed  
 by the names of the persons  
 who have been appointed to  
 the same offices for the  
 year 1878.





